

Te Whārangi Aromatawai mā te Pouako

Mā Hea Haere Ai ki te Kura?

Te pātai	Ngā aromatawai a te pouako
1. Tokohia katoa ngā ākonga o tēnei akomanga?	
2. Tuhia he kauwhata pou hei whakaatu mā hea ēnei ākonga haere ai ki te kura i te nuinga o te wā.	
3. Me pēhea te kohi i ngā kōrero mō tōu akomanga, arā, mā hea ngā ākonga haere ai ki te kura?	
4. Tokohia e haere ana mā raro, mā runga pahikara rānei?	
5. Ki tōu whakaaro, kei hea te kura o tēnei rōpū ākonga? He aha i pēnā ai ōu whakaaro?	
6. He aha ngā rerekētanga o tēnei rōpū ākonga me te rōpū ākonga i te kauwhata i tuhia e koe?	

Mā Hea Haere Ai ki te Kura?

Tūārere	1			2			3	
Tau	1	2	3	4	5	6	7	8

Tohu Ako: Te Tauanga
Kaupapa: Te whakaatu raraunga ki te kauwhata

Hei whakamārama

He tauira ngohe tēnei, hei aromatawai i te mōhio o te ākonga ki te whakaatu raraunga ki te kauwhata. Mā te āta mātakitaki me te āta whakarongo a te pouako ki te mahi a te ākonga, e mōhioatia ai te taumata o te ākonga, ngā wāhi e pakari ana, me ngā wāhi hei whakapakari ake.

I ētahi wā, mā te whakawhitiwhiti kōrero, mā te paku whakamārama rānei a te pouako, e kite ai te ākonga i te rautaki, i te huarahi rānei hei whakaoti i te ngohe.

E tika ana kia taunga te ākonga ki tēnei mea te whakaoti rapanga, te wetewete i ngā kōrero me ngā tohutohu, te āta whakaaro i te rautaki e hāngai ana, me te tūhonohono anō i ngā maramara mātauranga kei roto i tōna hinengaro. Koirā te āhua o tēnei ngohe aromatawai.

Me tuku kia mahia tēnei ngohe aromatawai i muri i ngā akoranga e hāngai ana ki te tauanga, kava e tuku mātiao noa iho.

Rauemi Tautoko:

Kei te whare whakaputu rauemi o Te Tāhuhu o te Mātauranga ēnei rauemi (Down the Back of the Chair), kei te whata rauemi tuihono hoki o Tāhūrangi.

- Te Poutama Tau, Pukapuka Tuarua: Te Uiui Aromatawai. Ko ngā kōrero whānui e pā ana ki te aromatawai pāngarau.
- Hei Tautoko i te Marautanga Pāngarau: Te Tauanga. Ko ngā huatau matua me ētahi ngohe whakaako mō te tauanga.

Ngā tohutohu

Whakaaturia te kāri, ākene pea me pānui tahi me te ākonga, kia mārama ai ngā kōrero.

Hoatu he wā hei whakaoti mā te ākonga i ngā pātai.

Tonoa te ākonga kia whakamārama i āna mahi. Tāruatia ‘Te Whārangi Aromatawai mā te Pouako’, hei tuhi māu i āna whakamārama, me ō whakaaro, ō whakataunga aromatawai.

Āta tirohia ngā kōrero kei te whārangi ‘Hei Ārahi i te Aromatawai’ hei āwhina i a koe ki te whakatau i te taumata e hāngai ana ki ngā mahi a te ākonga. Kei tēnei whārangi te ngako o te pāngarau e hāngai ana ki tēnei ngohe, me ngā tauira whakamārama a ngā ākonga.

Me mātua mōhio te ākonga

- ki te whakamāori kauwhata whakaahua, kauwhata pou hoki
- ki te kohi raraunga mō tētahi tūhuratanga tauanga
- ki te tuhi kauwhata pou

Ngā kupu pāngarau e hāngai ana

kauwhata pou

Ngā kupu e hāngai ana ki te horopaki

mā hea, mā raro, pahikara, whakaatu, uiui

Ngā rauemi

- te kāri ngohe
- he pepa tukutuku hei tuhi kauwhata pou

Ētahi ngohe whakaako e hāngai ana

Hei Tautoko i te Marautanga Pāngarau:
Te Tauanga

- Te Pōti
- Te Whakamāori Kauwhata Whakaahua
- Raraunga Whutupōro 1
- Matikara

He tauira pātai hei kukume whakaaro

- Whakamāramahia ngā mahi i oti i a koe i tō hinengaro. He aha tō mahi tuatahi? He aha tō mahi tuarua?
- He aha koe i whiriwhiri ai i tēnā i te tuatahi?
- E mōhio ana koe ki tētahi atu rautaki e hāngai ana ki tēnā pātai?
- He aha koe i mōhio ai ki tēnā?
- He aha i pēnā ai te teitei o tēnā pou o te kauwhata?
- E tohu ana ngā pou i te aha?

Hei Ārahi i te Aromatawai

Mā Hea Haere Ai ki te Kura?

Te pātai	Tau 2	Tau 3
1. Tokohia katoa ngā ākonga o tēnei akomanga?	E tika ana te kapo māramatanga i te kauwhata whakaahua, arā, ka tatauria, ka tāpiria rānei ngā māiti katoa o te kauwhata whakaahua.	
2. Tuhia he kauwhata pou hei whakaatu mā hea ēnei ākonga haere ai ki te kura i te nuinga o te wā.		E tika ana te whakaatu i ngā raraunga ki te kauwhata pou, arā: • ka tuhia he pou mō ia momo waka; • ka whakaaturia te tokomaha ki te tuaka pou o te kauwhata, ā, ka tika te teitei o ia pou; • ka tapaina ngā pou; • ka tapaina te kauwhata.
3. Me pēhea te kohi i ngā kōrero mō tōu akomanga, arā, mā hea ngā ākonga haere ai ki te kura?	Ka whakaputa kōrero mō te whakahaere pōitanga. Arā, ka tonoa ngā ākonga kia whakatū ringa hei whakaatu mā hea rātou haere ai ki te kura, ā, ka tataui i ngā ringaringa. Ka whakaputa kōrero mō te tuku i tētahi māiti ki ia ākonga me te tono kia whakamaui ki te ripene e hāngai ana.	Ka whakaputa kōrero mō te tuku i tētahi kāri hei tuhi mā ngā ākonga mā hea rātou haere ai ki te kura i te nuinga o te wā, ā, ka kohia ngā kāri, ka tataui ai.
4. Tokohia e haere ana mā raro, mā runga pahikara rānei?		E tika ana te kapo māramatanga i te kauwhata pou.
5. Ki tōu whakaaro, kei hea te kura o tēnei rōpū ākonga? He aha i pēnā ai ōu whakaaro?		Ka whakamāorihia te kauwhata pou i runga i te āhua o ngā raraunga e whakaaturia ana. Arā pea, he tautohu kei tuawhenua tēnei kura, ina te maha o ngā tāngata e haere ana mā runga pahi, me ētahi e haere ana mā runga hōiho.
6. He aha ngā rerekētanga o tēnei rōpū ākonga me te rōpū ākonga i te kauwhata i tuhia e koe?		Ka whakamāorihia ngā kauwhata pou i runga i te āhua o ngā raraunga e whakaaturia ana. Arā pea, he tautohu: • he pakeke ake te rōpū ākonga tuarua, ina he tokomaha ake e haere ana mā runga pahikara; • he nui ake te hautanga o ngā ākonga i te rōpū tuatahi e haere ana mā runga motukā.